



## SIARAN AKHBAR PRESS STATEMENT

S.A. 2015/12/125 (HQ)

### PEMASANGAN METER PINTAR KESELURUH MELAKA AKHIR 2016

Pemasangan Meter Pintar (*Smart Meter*) akan diperluaskan ke seluruh Negeri Melaka menjelang akhir tahun 2016 seiring dengan Pelan Tindakan Bandaraya Hijau kerajaan negeri, kata Timbalan Setiausaha Kerajaan (Pembangunan), Unit Perancangan Ekonomi Negeri Melaka, Jabatan Ketua Menteri Melaka, Datuk Ismail Hamad.

“Kerajaan Negeri Melaka amat berbangga menjadi salah satu di antara dua bandar yang terpilih untuk Projek Perintis *Smart Meter*,” katanya ketika melancarkan portal meter pintar di MITC, Ayer Keroh, Melaka hari ini.

Menurutnya Melaka komited terhadap usaha-usaha untuk meningkatkan tenaga lestari dan amalan kecekapan tenaga seperti program Meter Pintar.

Projek Perintis Pemasangan Meter Pintar bermula di Melaka dan Putrajaya masing-masing pada penghujung 2014 dan Mac 2015, bagi memahami teknologi, peraturan dan cabaran pengguna.

Untuk Negeri Melaka, meter untuk projek perintis telah siap dipasang pada Mac 2015 melibatkan 800 pengguna di Taman Tasek Utama, MITC.

Di Putrajaya pemasangan meter di bawah projek perintis dijangka siap dipasang sepenuhnya pada bulan Januari 2016 dengan melibatkan 200 pengguna.

Sementara itu, Pengurus Besar Negeri (Melaka), Bahagian Pembahagian TNB, Datuk Baderul Sham Saad berkata, projek perintis tersebut menggunakan teknologi terkini untuk mengoptimumkan sistem pembekalan elektrik dan secara tidak langsung akan memberi kesan positif terhadap alam sekitar.

Melalui Web Portal Meter Pintar, 800 pengguna program perintis di Melaka yang mendaftar akan boleh melihat data penggunaan tenaga elektrik mereka, kos elektrik dan impak terhadap alam sekitar.

“Justeru pengguna boleh membuat pemantauan terhadap penggunaan elektrik di premis masing-masing dan ianya juga boleh membantu pengguna dalam mengamalkan kecekapan tenaga elektrik dalam aspek kehidupan harian mereka,” katanya.

**Dikeluarkan di Melaka, pada 19 Disember 2015**

*Untuk sebarang pertanyaan lanjut, sila hubungi Nasruddin Syakir (019-956 0199)*

*atau Asyraf Zahardin (017-355 7508)*

[media@tnb.com.my](mailto:media@tnb.com.my)